

25.12.2015.

Udruženje poslodavaca je 25.12.2015.godine održalo godišnju pres konferenciju: Tekst prenosimo u cijelosti:

Udruženje poslodavaca BPK Goražde 2015.godinu završava sa gotovo pa ispunjenim Programom rada za ovu godinu.

Naime, glavni ciljevi i zadaci koji su postavljeni pred Udruženje poslodavaca su mjere na rasterećenju privrede i stvaranju boljih uslova za privređivanje privrednih subjekata sa područja BPK Goražde.

Udruženje poslodavaca BPK Goražde je još u mjesecu februaru ove godine na osnovu sastanka kojeg je imalo sa Premijerom kantona i njegovim saradnicima dogovorilo da dostavimo prijedloge koje zakonske propise bi bilo potrebno izmjeniti kako bi se privreda BPK Goražde rasteretila i stvorili bolji uslovi rada za privredne subjekte.

Udruženje poslodavaca je dostavilo prijedlog za izmjenu 6 zakonskih propisa koje smo smatrali da mogu promijeniti stanje u privredi nabolje, a to su: Zakon o šumama, Zakon o administrativnim taksama BPK Goražde, Zakon o sudskim taksama BPK Goražde, Zakon o komunalnim taksama BPK Goražde, Zakon o porezu na imovinu, naslijeđe i poklon, te Zakon o porezu na promet nepokretnosti i prava.

Nedugo zatim Vlada BPK Goražde je prihvatila da u proceduru ide izmjena 2 zakona: Zakona o administr.taksama i Zakona o sudskim taksama, dok je Zakon o komunalnim taksama na kojima smo takođe uputili prijedloge za izmjenu, dat općinama da svojim odlukama mogu smanjiti iznos do 40%.

Bitno je takođe napomenuti da je ukinuta i Odluka o mjerama neposredne kontrole cijena određenih proizvoda i usluga, koja je otežavala rad poslovnih subjekata u trgovini.

Izmjene ostalih zakona očekujemo u slijedećoj godini.

Udruženje poslodavaca BPK Goražde 2015.godinu će ponajviše pamtiti po obilježavanju 10 godina od osnivanja. Naime, 6 maja smo obilježili 10 godina postojanja i to je bio momenat da se podvuče crta i vidi šta je urađeno za proteklih 10 godina.

Najznačajniji rezultati su ostvareni u afirmaciji i povezivanju privrednih subjekata, te legitimno zastupanje interesa poslodavaca u pregovorima sa Vladom i Sindikatima kroz Ekonomsko-socijalno vijeće u kojem dajemo najveći doprinos u radu.

Također, tog dana je promovisan „Privredni vodič BPK Goražde“, nova publikacija koju smo izradili u kojoj je sadržano 140 privrednih subjekata sa oblikom organizovanja d.o.o. i d.d. Privredni vodič je veoma pozitivno prihvaćen, te je već veliki broj distribuiran na mnogo adresa a ponajvažnije je značajno što je dostavljen oko 40 ambasada, te na taj način omogućeno i povezivanje sa poslovnim partnerima iz inostranstva.

U 2016.godini ćemo nastaviti sa prijedlozima za rasterećenje privrede, kako kantonalnih i općinskih tako i federalnih propisa. Ono što najviše opterećuje poslodavce su visoke stope doprinosa na plaće, što u praksi znači da na svakih 100 KM isplaćene plaće poslodavac je dužan državi isplatiti dodatnih 70 KM.

U 2016.godini fokusiraćemo se i na općinske propise koji opterećuju privredu, tu posebno navodimo komunalnu naknadu, koja se naplaćuje po osnovu Zakona o komunalnim naknadama. Vrijednost boda određuje općinsko vijeće, tako da je za ovu godinu vrijednost boda u općini Goražde 0,07 KM, u općini Pale FBiH 0,05 KM, dok općina Foča FBiH nije još donjela odluku o visini boda. To je u praksi veliko opterećenje za privredu, jer se bod množi sa površinom poslovnih objekata, odnosno zonom u kojoj se nalazi.

Osvrnućemo se i na visinu rente, za koju takođe smatramo da je visoka.

U ovoj godini u općini Goražde visina rente je iznosila 925,00 KM, u općini Pale FBiH 400,00 KM i u općini Foča FBiH takođe 400,00 KM.

To u praksi znači, npr. u općini Goražde da u prvoj zoni koja je 6% iznos rente iznosi 55,5 KM, dok u općini Foča FBiH u prvoj zoni iznosi 20,00 KM, a u općini Pale FBiH 14,00 KM.

2015. godinu je obilježio i novi Zakon o radu FBiH, kao i proces donošenja novog općeg kolektivnog ugovora.

Video: Dnevnik RTV BPK Goražde 25.12.2015. godine

https://youtu.be/jTz7B_A8cqY

Prilog: od 7 minuta, 23 sekunde

Link: https://www.youtube.com/watch?v=jTz7B_A8cqY